


TEZAU LITURGIC
9 FEBRUARIE
PR.ILIE TETERKO

SLUJBA
SF.MUCENIȚE
APOLONIA
DE LA
ALEXANDRIA



ODESSA, 2022



СЛУЖБА

святой мученице Аполлонии, диакониссе Александрийской

НА ВЕЧЕРНИ

На Господи, воззвах: **стихиры, глас 4:**

Яко благоразумная и избранная дева, / возжгла еси в сердце твоём лампаду огня Божественнаго, / орошая преизобильно елеем доброт твоих путь жизни своей, / душею всегда отзываяся на вышнее призвание. / Сего ради возшла еси в Небесный чертог страданьями за Христа, / Спасова служительница, Аполлония всечудная, / молися грехов оставление даровати, // любовьию празднующим святую память твою.

Явилася еси посреде мучителей, / аки в волцех суровых, агница нескверная, / сих зверовидное нечестие побеждаючи, / и Христу, яко благоприятный фимиам принеслася еси, / чрез огонь воспаривши в Небесное Царство, // Аполлония всеславная, молитвенице о душах наших.

Изрядную угодницу Христову, / церкви Александрийския диакониссу всечестную, / песнями благохвальными почтим Аполлонию старицу блаженную, / яко исполнена яве

благодати / и Божественными сияньми
преукрашена, // яже молится о душах наших.

Слава, глас тойже:

Кровными каплями / безбожия огонь погасивши,
великомученице, / Христову Церковь напоила
еси богато / и верных сердца уяснила еси, /
благочестно почитающих, Аполлоние славная, //
твою священную и честную память любовию.

И ныне, Богородичен, глас тойже:

Огнь рождши нестерпимый, / пополяющ грехи и
орошающ верных, / вещная безмерных моих
согрешений, / попали молитвами Твоими,
Пренепорочная Чистая, / и росой истаявшую
страстьми душу мою прохлади, / яко да
велегласно // Твою милость и силу величаю, раб
Твой, Марие Всепетая.

Или Крестобогородичен, глас тойже:

Не рыдай Мене, Мати, / зряци на Древе
повешена Твоего Сына и Бога, / на водах
Повесившаго всю землю неодолимо / и всякое
творение Создавшаго; / ибо воскресну и
прославлюся, / и адова царствия сокрушу
крепостию, / и погублю того силу, / и связанные
избавлю от злодейства его, яко Благоутробен, //
и Отцу Моему приведу, яко Человеколюбец.

На стиховне, Слава святой, глас 1:

Плоть свою воздержанием увядивши, /
терпением мучений врага низложила еси
коварствия / и победу взяла еси на него, / о
Аполлоние Богоблаженная. / Тем ты венча во
огненнем страдании // Иисус Человеколюбец и
Спас душ наших.

Тропарь, глас 4:

Александрийския Церкви похвалу, / старицу
Богоблаженную Аполлонию / прославим ныне в
песнях, вернии, / яко та любовию
Божественною разжегши душу свою, / во огонь
вошла дерзновенно, мучителей посрамивши, / и
в Царство Христово возшла еси со славою, //
идеже молится о душах наших.

НА УТРЕНИ

Канон святых, глас 2.

Песнь 1

*Ирмос: Грядите, людие, / поим песнь Христу
Богу, / раздельшему море, / и наставльшему
люди, яже изведе из работы египетския, // яко
прославися.*

Мудрость словесем моим подаждь, Благий
Господи, / страстоносицы Твоей Аполлонии
мольбами / и сию воспети, Спасе, сподоби ми.

Возжелавши Христовы красоты и Сего любовь
снедаема, / страданием сочталася еси Ему, /
Аполлоние Богомудрая и всеславная.

Яко огонь тепла ревность веры твоей, мученице
Аполлоние, / еюже попрапа еси неверных
настояние / и победы венец взяла еси
страданием.

Богородичен: Святая Дево, Мати Христова, /
мучеников слава и Ангелов радости, / с ними
моли Сына Твоего ущедрити и спасти рабы Твоя.

Песнь 3

Ирмос: *На камени мя веры утвердив, /
разширил еси уста моя на враги моя. /
Возвесели бо ся дух мой, вегда пети: / несть
свят, якоже Бог наш, // и несть праведен паче
Тебе, Господи.*

Зубов сокрушение и огненная стремления /
юношески подъяла еси, старице Аполлоние
всечестная, / силою Креста укрепляема.

Подвигов ранами удобряяся, / душу светлейшу
солнечнаго сияния соделала еси, / яко
служительница Христова, страстотерпице
всевлавная.

Богородичен: Ангелов удивление, человеков
дерзновение, Богородице Чистая, Приснодево, /
моли Христа Бога, спасти непрестанно Тя
блажащия.

Седален, глас 4:

Уяснив житие твое добродетелей красотами, /
служительница нареклся еси Церкви
Александрийския, Аполлоние блаженная, /
кровию же мучения себе украсив, / горе к
Невещественным ликом преставилася еси. / С
нимиже о нас Христа, матери, моли // помиловати
души наша.

Слава, и ныне, Богородичен, глас тойже:

Единая Чистая и Пречистая Дево, / Яже Бога
безсеменно рождающая, // моли спастися душам
нашим.

Песнь 4

*Ирмос: Пришел еси от Девы, / не ходатай, ни
Ангел, / но Сам, Господи, воплощся, / и спасл еси
всего мя человека. / Тем зову Ти: // слава силе
Твоей, Господи.*

Лучами Креста сияючи, присноблаженная, /
терпяще огненную муку, / прелести углие росую
любве Христовы погашаючи.

Была еси кротка и незлобива, смиренномудра же
и тиха / и любве Божественный исполнена, /
мученическими при кончине украсилася еси
венцы.

Богородичен: Невесту Тя безвестну
исповедаем / и чисто селение Иисусово,
Богородице Дево Марие, / и Херувим
святейшую.

Песнь 5

Ирмос: Света подателю и веков Творче, Господи,
/ во свете Твоих повелений настави нас; //
разве бо Тебе иного бога не знаем.

Единаго Тя, Господа Иисуса, исповедавши,
славная, / рукою человека создавшего, / во огонь
дерзновенно входит старица всечестная, / муки
мужески терпящи.

Претерпела еси муки доблественно, любовию
Божественною исполнена, / и Богу себе от
юности возложивши, умерети за Него не
отверглася еси, / повеления Того послушая и
стопам спасительным последую.

Богородичен: Архангельский глас вопием Ти: /
Радуйся, Благодатная, Господь с Тобою; /
радуйся, Благословенная, Заступница наша и
скорая в бедах Помощница.

Песнь 6

Ирмос: В бездне греховней валяясь, /
неизследную милосердия Твоего / призываю
бездну: // от тли, Боже, мя возведи.

К будущей славе взирая, всечестная, /
маловременную ни во чтоже вменил еси; /
темже ты ничтоже возможе разлучити от любви
Христовы: / ни жестокая биения, ни зубов
сокрушение, ни огня разгорение, / ниже
тленныя славы обещание.

Девство твое соблюде непоругано Христос
Господь, мученице Аполлоние достославная, / и
престави тя от земных скорбей к Небесней
радости.

Любовию ко Спасителю рода человеческого
воспылавши, всечестная, / востекла еси во след
заповедей Его / и на огонь взошла еси
дерзновенно.

Богородичен: Милости Твоя, Богородице,
сподоби мя, премилостиваго Спаса рождшая, /
Своею кровию от смерти вечныя человеки
избавльшаго.

Кондак, глас 2:

Мученическими красотами / Владычнему
Престолу предстоящи / и Божественными
блистаниями сияющи, / нас, поющих твою память,
// страстотерпице Аполлоние, просвети.

Песнь 7

Ирмос: Да преславное рождество Твое, Христе, /
еже от Девы прообразиши яве, / неопалимы в
пещи отроки сохранил еси, / песньми поющыя
Тебе: // отцев, Боже, благословен еси.

Яко агница на жертву ведома, славная, /
никакоже провещала еси, Владыце твоему
подобяся, / Егоже ради и смерть пренебрегла
еси.

Разгарашеся на тя яростию мучители, / зря ты непреклонну и повеления Господня хранящу, / огонь разложиша, устрашити ты хотя, / но посрамила еси дерзость их, приемши муки волею.

Богородичен: Преестественно Создателя от утробы Твоей, Дево, родити сподобилася еси, / земныя назидаяща, поющая верою: / отцев Боже, благословен еси.

Песнь 8

Ирмос: *Пещь иногда огненная в Вавилоне действия разделяше, / Божиим велением халдеи опаляющая, / верныя же орошающая, поющая: // благословите, вся дела Господня, Господа.*

Мученица явльшася, Небесная божественне наследовала еси / и престолу предстоиши Создателя, вопия: / благословите, вся дела Господня, Господа.

Одождении Божественными угасила еси многобожия пещь, / разжегшеся Божественною любовью прерадостно, / и ныне песнопоеши, Аполлоние всеславная: / благословите, вся дела Господня, Господа.

Просвещеся зарею Святыя Троицы, Богоблаженная, / тьму прелести отгнала еси и славу улучила еси, песнопойуще: / благословите, вся дела Господня, Господа.

Троичен: Яко Единицу естеством, Тя пою,
Божество Всесвятое, / в триех ипостасях
Единого Создателя, радуясь зову: /
благословите, вся дела Господня, Господа.

Богородичен: Слово Отца Небесного
Единосущное, / Адамово избавление от кровей
Твоих девственных воплотися, Дево Марие
Чистая, / Емуже благодарственне зовем: /
благословите, вся дела Господня, Господа.

Песнь 9

Ирмос: *Безначальна Родителя Сын, Бог и
Господь, / воплощься от Девы нам явися, /
омраченная просветити, / собрати
расточенная: // тем всепетую Богородицу
величаем.*

Целомудрием украшаема и мирностию духа, /
раны твердым умом твоим терпела еси, / дух
твой предавая в руке Небесного Отца.

Звезда светла возсияла еси в мире, / сиянием
священным озаряя мысли верных, Аполлоние
преблаженная, / темже ты верно ублажаем.

Разжигается любовью Вседержителя, / вошла
еси мужественно во огонь / и, терпеливно
пострадав, расторгла еси змия великаго, /
Аполлоние старице Богоблаженная.

Богородичен: Глас Тебе ангелов, Пречистая,

вопием: / радуйся, спасение всех человеков / и славных мучеников Божественное венчание.

Светилен:

Трисиянному Великому Свету ныне предстоя / и в неизреченней светлости со всеми святыми пребывая, / Аполлоние всечудная, помяни всех нас, / память твою светоносную совершающих.

Слава, и ныне, Богородичен:

Зарю пресветлую, являющую нам Солнце незаходимое, вемы, Тя, Пресвятая Дево Богородице. / Сего ради молим Тя: яко Мати Света сущи, / просвети нас светом Сына Твоего, Христа Бога нашего.

На стиховне, Слава, глас 1:

Мучений огонь, Духа Святаго росую погасила еси, / старице Аполлоние всечестная, / и к Свету преставилася еси божественному и невещественному, / и по кончине блаженней источаеши исцелений капли, // уставляющи разжжение страстей силою духовною.

И ныне, Богородичен, глас тойже:

Молитвы Твоих рабов прими, Богородице, / и избави нас от всякия беды, // яко рождшая Христа Спаса, Избавителя душ наших.

[К завтрашней памяти святой мученицы Аполлонии
диаконисы, Александрийской (†249), выкладываю в
«Уставные заметки» шестиричную службу ей,
составленную клириком города Одессы (Украинская
Православная Церковь) **протоиереем Илией
Тетерько.**]

